

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- उपराज्यपाल मनोज सिन्हा होरें आखेआ जे जम्मू कश्मीर पुलिस दी दलेरी ते कम्म करने दा तरीका लोकें गी इस गल्ले दा संदोख दिंदा ऐ जे जम्मू कश्मीर सुरक्षत हत्थें च ऐ।
- उपमुख्यमंत्री सुरिन्दर चौधरी होरें नौशेहरा विधानसभा हल्के च पानी सप्लाई स्कीमें दी प्रगति दा जायजा लैता।
- मुख्य सचिव अटल डुल्लू होरें जम्मू प्रांतै च सैलसफा गी बढ़ावा देने सरबन्धी बक्ख-बक्ख योजनाएं दे बारे च सरबन्धत धड़ें कन्नै सलाह सूत्र कीता।
- जम्मू दे डिवीजनल कमीशनर रमेश कुमार होरें जंदे रोज आए दे अंधी झक्खड़ करी सार्वजनिक संपत्ति गी होए दे नुकसान दा जायजा लैता।
- जम्मू नगर निगम दे कमीशनर होरें मुतल्लका अधिकारिणं गी औंदे दिनें च खराब मौसम दी पेशगोई गी दिखदे होई मता सौहगा रौहने लेई आखेआ।

<><><><><><>

LG-J&K Police

उपराज्यपाल मनोज सिन्हा होरें आखेआ जे एह जम्मू कश्मीर पुलिस दी दलेरी ते बहादुरी ऐ जेह्दे कन्नै इत्थें दे लोकें गी भरोसा ऐ जे जम्मू कश्मीर सुरक्षत हत्थें च ऐ। उनें आखेआ जे जम्मू कश्मीर पुलिस, फौज, नीम फौजी बल ते सब्बै सुरक्षबल जम्मू कश्मीर गी पूरी आतंक-मुक्त बनाने लेई वचनबद्ध न ते इस भेठा लगातार कारवाई बी जारी ऐ। उपराज्यपाल होरें एह गल्ल गांदरबल च जम्मू कश्मीर पुलिस च सिपाहिणं दी इक पासिंग आउट परेड दरान किट्ठ गी संबोधत करदे होई आक्खी। इस पासिंग आउट परेड च कुल 438 नमीं भर्थी होए दे नोजवान शामिल हे, जिंदे चा 36 महिला बी हियां। इंदे चा 211 सिपाहिणं पैहले एसपीओ दे तौरा पर बी अपनी सेवाएं दित्ती दियां न।

<><><><><><>

LG-SKUAST

शेरे कश्मीर एग्रीकल्चर यूनिवर्सिटी कश्मीर दे वाइस चांसलर प्रो. नजीर अहमद गनेई होरें कल उपराज्यपाल मनोज सिन्हा होरें गी मिले ते बक्ख-बक्ख विषयें पर गल्लबात कीती। प्रो. नजीर अहमद गनेई होरें उपराज्यपाल होरें गी यूनिवर्सिटी दे नमें कार्यक्रमें ते पैहजकदमिएं दे बारे च दस्सेआ जिंदे च विद्यार्थिएं लेई 2 हफतें दा फाउंडेशन प्रोग्राम, बीएं दे बारे एआईसीआरपी दी सलाना बैठक ते 42 करोड़ रुपें दी लागत कन्नै भारत सरकार आस्सेआ मंजूर आधुनिक तरीके कन्नै राई-बाई सरबंधी कार्यक्रम लागू करना बी शामिल ऐ। वी. सी होरें मनोज सिन्हा होरें गी दस्सेआ जे आईआईटी बाम्बे कन्नै मिलियै ग्रामीण डेटा अनुसंधान केन्द्र बी स्कास्ट श्रीनगर च तैआर कीता जा'रदा ऐ।

<><><><><><>

Dy. CM

औंदे गर्मी दे मौसम दरान निर्बिघ्न पानी दी सप्लाई जकीनी बनाने दे मकसद कन्नै उपमुख्यमंत्री सुरिन्दर चौधरी होरें नौशेहरा हल्के च जल-शक्ति मैहकमे दे कम्में काजें दी प्रगति दी समीक्षा कीती। जम्मू च लग्गी दी इक बैठक दरान जल शक्ति दे चीफ इंजीनियर होरें दस्सेआ जे इसलै नौशेहरा हल्के च कुल 70 स्कीमां चला'रदियां न। 51 जल जीवन मिशन तैहत 18 यूटी कैपेक्स तैहत ते 1 नाबार्ड तैहत चला'रदियां न तां जे नौशेहरा च पानी दी कमी गी पूरा कीता जाई सकै। उपमुख्यमंत्री होरें सब्बने सेक्टरें दा योजनाबद्ध जायजा लैने मगरा मुत्तलका अधिकारिं गी निर्देश दित्ते जे इनें स्कीमें मुत्तलका सब्बै कम्म समे सिर पूरा करने दे कन्नो कन्नी गुणवत्ता जकीनी बनाना लोड़चदी ऐ।

<><><><><><>

CS Tourism

जम्मू प्रांते च सैलसफा गी होर मता बढ़ावा देने दी दिशा च इक महत्वपूर्ण गेंह पुट्टदे होई सैलसफा विभाग नै मुख्य सचिव अटल डुल्लू होरें गी कल इकबैठक दरान इस भेठा इक रणनीतिक रूपरेखा बारे दस्सेआ तां जे खित्ते च सैलसफा च होर मता बाद्धा कीता जाई सकै। बैठक दरान मुख्य सचिव होरें जारे देइयै आखेआ जे सैलसफा आली थाहर दी मशहूरी कीती जा ते इसलै जारी जतनें गी दूना कीता जा। उनें मैहकमे गी किश थाहरें पर पानी पर किशती चलाने सरबंधी राफिटिंग ते पैराग्लाइडिंग गी शुरू करोआने लेई बी आखेआ। इस मौके पर सैलसफा मैहकमे दियां कमीशनर सचिव यशा मुग्दल होरें जम्मू गी साल भर चलने आले बन-सबबनता आली थाहर बनाने लेई इक प्रेसन्टेशनबी दस्सी।

<><><><><><>

Div.Com Jammu

जम्मू दे डिवीजनल कीमशनर रमेश कुमार होरें दो-त्रै रोज पैहले आए दे अंधी झक्खड़ करी होए दे नुक्सान दा कल जायजा लैता ते पुर्नबहाली दे कम्में दी समीक्षा कीती। बैठक च जम्मू बिजली बंड निगम लिमिटेड दे प्रबंध निदेशक, जम्मू नगर निगम दे कमीशनर, जम्मू प्रांतै दे बक्ख-बक्ख जिले दे डीसी, बिजली विकास, जलशक्ति ते सरबंधत होरने मैहकमे दे चीफ इंजीनियर ते होर केई अधिकारी बी मजूद हे। डिवीजनल कमीशनर होरें सब्बने जिला विकास कमीशनरें गी निर्देश दित्ता जे ओह पुर्नबहाली दे कम्में पर आपूं नेड़मीं तक्क रखन ते कन्नै तूफान करी होए दे नुक्सान बारे इक तफसीली रिपोर्ट तैआर करन। उनें सरबंधत मैहकमे गी नुक्सान पुज्जे दे सार्वजनिक ढांचे दी मरम्मत दे कम्में च तेजी आहन्नने लेई बी आखेआ ते कन्नै सार्वजनिक संपत्ति, मालबच्चे ते होर दुए नुक्सान दा बी जायजा लैने लेई आखेआ तां जे प्रदेश आपदा राहत फंड चा प्रभावते गी मुआवजा जां राहत दित्ती जाई सकै।

<><><><><><>

JMC

जम्मू नगर निगम दे कमीशनर डॉ. देवांश यादव होरें जम्मू च भारी बरखा ते अंधी झक्खड़ ते तूफान चलने दी पेशगोई गी दिक्खदे होई सब्बने मैहकमे ते मुत्तलक अधिकारिएं गी होई अलर्ट पर रौहने दे निर्देश जारी कीते न। इस्सै सिलसिले च ट्रांसपोर्ट अधिकारिएं गी विशेष हिदायतां दित्तियां गेइयां न जे शिड़के थमां डिग्रे दे दरख्त, खम्बे जां होर कोईमलबा बगैरा तौले गै हटाई दित्ता जा तां जे कोई हादसा पेश नेई आवै। एहदे अलावा इस दरान लोकें दी सहायता लेई 2 हैल्पलाइन नंबर बी जारी कीते गे न— 94697-48042 ते 94193-72824। लोकें गी सलाह दित्ती गेई जे बड़े मते खराब मौसम दरान घरै अंदर गै रौहने मे कुसै बी आपदा आली स्थिति दरान इनें नंबरें पर संपर्क करन।

<><><><><><>

Property Attached

समाज थमां नशे दी माड़ी कबैतु गी खत्म करने दे मकसद कन्नै उधमपुर पुलस, पुंछ च कुनिया दे मोहम्मद हाफिज दा 7 मरले जमीन बने दा 2 मंजिला रिहायशी मकान अवैध कीता ऐ, जेहदी कीमत तकरीबन 1 करोड़ रुपे दस्सी जा'रदी ऐ। डीएसपी मुख्यालय प्रहलाद शर्मा, रेहम्बल पुलस थाने दे एसएचओ इंस्पैक्टर निशात अहमद ते जेसीपीपी टिककरी थमां पुलस सब-इंस्पैक्टर मनवीर सिंह हुंदे आस्सेआ कीते गेदी तैहकीकात दरान पता लग्गेआ ऐ जे संपत्ति गैर कनूनी तौरा पर कब्जाई गेदी जिमहं ही जेहड़ी नशीले पद्वार्थे दी तस्करी थमां कमाए गेदे पैहे कन्नै खरीदी गेदी ही। एहदा मालक इसलै न्यायिक हिरासत च ऐ।

<><><><><><>

Ramban(byte)

रामबन जिले च मैहकमा पशुपालन, करसान ते पशुपालकें गी जागरूक बनाने लेई नियमित तौरा पर केई पैहलकदमिएं ते कारवाइएं गी अंजाम दिंदा आवा'रदा ऐ तां जे राई-बाई दे मुख कम्मं दे कन्नो कन्नी ओ पशुपालनख कुकड़ी पालन ते होरने कम्मं गी अपनाइयै अपनी औंदन च बाद्धा करी सकन। मैहकमा "फ्री रेंज पोल्टरी फार्मिक" गी बढ़ावा देआ करदा ऐ जेह्दे तैह्त्त कुकड़िएं गी इक्कै थाहरें खुंडडे च डक्की रखने दे बजाए उनेंगी आले दुआले दे म्हौल च फिरने टुरने, चुगने लेई खुल्ला छोड़ने गी बढ़ावा दित्ता जंदा ऐ ते मते सारे लोक अज्ज कल कुदरती म्हौल च पाले ते तैआर कीते गेदे उत्पाद पसिंद करदे न। कुकड़िएं गी आले दुआले कुदरती म्हौल च उपलब्ध कीड़े मकोड़े, दानें, बीह ते होर चीजां चुगने दा मौका थ्होंदा ऐ जेह्दे नै उंदी अपनी बरोस बी ठीक होंदी ऐ ते कन्नै चपासम च कुदरत दा तवाजन बनाई रखने च बी मदद थ्होंदी ऐ। इस बारे आकाशवाणी कन्नै गल्ल करदे होई जिले दे मुख पशुपालन अधिकारी डॉ. सुहेल कावूसा होरें आखेआ.....

<><><><><><>

YUVA

जम्मू खित्ते दे बक्ख-बक्ख हिस्से च मिशन युवा तैह्त्त "युवा दूत" लेई इक व्यापक सिखलाई कार्यक्रम दा सरिस्ता कीता गेआ। इस सिलसिले च जिला प्रशासन सांबा च इयै नेह् इक कार्यक्रम दा आयोजन कीता गेदा हा। जेह्दी सदरत डिप्टी कमीशनर राजेश शर्मा होरें कीती। इस्सै चाल्ली राजौरी च आईटीआई परिसर च बी युवा दूत लेई सिखलाई कार्यक्रम लोआया गेदा हा। तोआई रामबन दे डिप्टी कमीशनर बशीर-उल-हक चौधरी हुंदी दिक्ख-रिक्ख च बी ऐसे इक कार्यक्रम दा सरिस्ता कीता गेआ हा। अस सिखलाई कार्यक्रम दा मकसद मिशन युवा तैह्त्त, युवा दूत दे कम्मंकाजें ते जिम्मेदारिएं बारे जानकारी बनाना हा तां जे पंचैती सतह पर असरदार अमलावरी जकीनी बनाई जाई सकै।

<><><><><><>